

Kalaallit Nunaanni meeqqat inuusuttullu angerlarsimaffiup avataanut inissinneqartartut sullinneqarnerisa nakkutigineqarnerat sukateriffigineqaqqullugu Naalackersuisut sulissuteqaqqullugit Inatsisartut aalajangiiffigisassaattut siunnersuut
(Siunnersuut UKA 2009-mut Atassutip ilaasortaaitaanit saqqummiunneqarpoq)

pillugu

Ilaqutariinnermut Ataatsimiititaliap

ISUMALIUTISSIISSUTAA

Siunnersuutip aappassaaneerineqarnerani saqqummiunneqartooq

Ilaqutariinnermut Ataatsimiititaliap kingullermik suliarinninnermini ukuningga inuttaqarpoq:

Inatsisartunut ilaasortaq, Debora Kleist, Inuit Ataqatigiit, Siulittaasoq
Inatsisartunut ilaasortaq, Jane Petersen, Inuit Ataqatigiit, Siulittaasup tullia
Inatsisartunut ilaasortaq, Astrid Fleicher Rex, Demokraatit
Inatsisartunut ilaasortaq, Ruth Heilmann, Siumut
Inatsisartunut ilaasortaq, Knud Kristiansen, Atassut

UKA 2009-mi siullermeerinninnerup kingorna siunnersuutip imarisai Ilaqutariinnermut Ataatsimiititaliap sukumiisumik misissorpai.

Siunnersuutip imarisaa siunertaalu

Meeqqat inuusuttullu angerlarsimaffiup avataanut inissinneqarsimasut pillugit inatsisitigut sinaakkutissat ersarissarneqarnissaat sukateriffigineqarnissaallu siunnersuuteqartup siunnersuuteqarnermigut kissaatigaa. Ulloq unnuarlu angerlarsimaffiit pisortanit pigineqarlutillu ingerlanneqartut saniatigut angerlarsimaffiit namminersortut arlallit, angerlarsimaffittut imminnut pigisutut ingerlanneqartut meeqqanik inissinneqarsimasunik tigummiqaartarnerat siunnersuuteqarnermut tunngaviuvoq.

Siunnersuuteqarnermi siunertarisaq pingasoqiusaavoq, siunnersuuteqartup makku naammassineqarsimanissaat kissaatigimmagu:

- 1) Ulloq unnuarlu angerlarsimaffinnut piumasaqaatit sukateriffigineqarnissaat ersarissarneqarnissaallu.
- 2) Naalackersuisut nakkutiginnittussaaitaanerata ersarissarneqarnissaa.

- 3) Meeqqat pillugit paasisimasalittut qitiusumik ataatsimiititaliap suliaasa ersarissarneqarnissaat.

Siunnersuutip Inatsisartunit siullermeerneqarnera

Ulloq 23. oktober 2009-mi siunnersuut siullermeerneqarpoq, tassani partiit tamarmik, Inatsisartunut ilaasortat Naalakkersuisullu siunnersuummut oqaaseqarnissamut periarfissaqarlutik. Oqallinnermit makku erseqqissaatigineqassapput:

Naalakkersuisut:

Ulloq unnuarlu angerlarsimaffinnut piumasqaatit ersarissarneqarnissaat sukateriffigineqarnissaallu pillugit siunnersuuteqartup apeqqutaanut tunngatillugu ulloq unnuarlu angerlarsimaffinnik nalinginnaasumik nakkutilliineq peqqissaartumik akuersissuteqartarnermik aallaaveqartartoq siullermeerinermi Naalakkersuisut oqaatigaat. Inissiivigineqartartut akuerineqarneranni piumasqaataasut aallaavigalugit Naalakkersuisoqarfik nakkutilliinermik ingerlatsisarpoq. Ulloq unnuarlu angerlarsimaffinnik pilersitsinermi periutsit ersarissarnerat Isumaginninnermut Naalakkersuisoqarfimmit ingerlanneqartoq Naalakkersuisup oqaatigaa. Angerlarsimaffiit nutaat akuerineqartarnerinut atatillugu ilitersuut nutaaq 2009-p ingerlanerani Naalakkersuisut piariissagaat siullermeerinermit atatillugu ilanngullugu paasissutissiissutigineqarpoq.

Aammattaaq Naalakkersuisut siunnersuummut akissuteqaammi paasissutissiissutigaaat nakkutilliinermi suliassat tassaasut meeqqamik immikkut nakkutilliineq kommuninit akisussaaffigineqartoq aammalu nalinginnaasumik nakkutilliineq (inissiivimmik immikkoortortap nakkutilliinera) Isumaginninnermut Naalakkersuisoqarfiup pisussaaffigisaa. Nakkutilliinerup siunertaraa meeqqap inuusuttulluunniit angerlarsimaffiup avataanut inissinneqarsimasup sapinngisamik pitsaanerpaamik inuuneqarnissaa qulakkiissallugu. Naalakkersuisut kommuninik nalinginnaasumik nakkutilliinermik ilaatut nakkutilliillutik takuniaanerminni kommunini suliassanik aalajangersimasunik misissuinissamut aammalu suliat aalajangersimasut pillugit saaffiginnissutinut atatillugu misissuinissamut pisusaapput. Suliat aalajangersimasut misissornerisigut kommuninik nakkutilliineq ingerlanneqartartoq, taamaalillunilu isumaginninnikkut malittarisassanik kommunit aqutsinerisa pitsaassusiat, tassungalu ilanngullugu meeqqanut ataasiakkaanut iliuusissatut pilersaarutit qulakkeerneqartartut Naalakkersuisut oqaatigaat.

Aammattaaq Naalakkersuisut oqaatigaat meeqqat pillugit paasisimasalittut qitiusumik ataatsimiititaq meeqqat inuusuttullu pillugit Inatsisartut peqqussutaanni ersarissumik maleruagassiunneqarsimasoq. Suliassaa pingaarneq tassaavoq ulloq unnuarlu angerlarsimaffimmit imaluunniit ilaqutariinnit inuussutissarsuutigalugu paarsisartunit meeqqap angerlartinneqarnissaa isumaqatigiinngissutigineqartillugu oqaaseqaateqarnissaa.

Kiisalu siullermeerinermut atatillugu Naalakkersuisut oqaatigaat nakkutilliinermut suleqatigiissitamik, nakkutilliinerup pitsanngorsarneqarnissaa siunertaralugu naalakkersuisoqarfiup nakkutilliineranik ingerlaavartumik naliliisartussamik pilersitsisoqarsimasoq aammalu nakkutilliinerup pitsanngorsarneqarnissaanut missingiusiamik suliaqartoqartoq. Taamatut iluarsaaqqinnermik suliaqarnerup naammassinissaata piffissaa aalajangersarneqarsimannngimmat siunnersuut taama iluseqartillugu akuersarneqassanngitsoq Naalakkersuisut kaammattuutigaat.

Inuit Ataqtigiit aamma Kattusseqatigiit Partiiat:

Siunnersuummut tunuliaqutaasoq paasillaritsik Inuit Ataqtigiit Kattusseqatigiillu Partiiata ataatsimoortumik oqaaseqaatiminni oqaatigaat. Angerlarsimaffiit imminnut pigisut pillugit peqqussummi sukaterinissamik kissaateqarneq isumaqatigaat, erseqqissaatigerusulluguli sukaterinermik ingerlatsineq piffissamik atuiffiusariaqartoq.

Naalakkersuisulli angerlarsimaffinnut imminut pigisunut atatillugu periutsinik erseqqissaallutik suliamik ingerlatsinerat aammalu ilitsersuutip nutaap piareerneqarnera Inuit Ataqtigiit Kattusseqatigiillu Partiiata iluarisimaarpaat. Kiisalu nakkutilliinermik ingerlaavartumik naliliisartussanik Naalakkersuisoqarfiup suleqatigiissitaliorsimanera Inuit Ataqtigiinnit Kattusseqatigiillu Partiiannit iluarisimaaneqarpoq.

Inuit Ataqtigiit Kattusseqatigiillu Partiiat isumaqarput misissuinissat annertuut siunnersuummi ugartorneqartut piffissamik annertuumik atuiffiusariaqartut. Tamanna tunngavigalugu siunnersuutip taama iluseqartillugu akuersarneqannginnissaanik Naalakkersuisut kaammattuutaat Inuit Ataqtigiinnit Kattusseqatigiillu Partiiannit malinneqarpoq.

Siumut:

Meeqqat inussuttullu ulluinnarni pitsaanerpaamik atugaqarnissaat meeqqanut inuusuttunullu ikiorsiisarneq pillugu inatsisikkut qulakkeerniarneqartoq Siumup oqaatigaa.

Taamaattumillu Siumut nangilluni oqarpoq meeqqanut inuusuttunullu ikiorsiisarnermi peqqussut malillugu ulloq unnuarlu angerlarsimaffiit aqunneqarnissaat pisariaqartoq. Inissiineq kommunit tamakkiisumik akisussaaffigaat nalinginnaasumillu nakkutilliinermi akuutinneqassallutik. Ajornartorsiutit meeqqap angerlarsimaffiani aaqqinniarnaqassapput. Angerlarsimaffimmut isumannaatsumut meeqqap uteqqinnissaanik siunertaqarluni meeqqanik sivikinnerpaamik angerlarsimaffiup avataanut inissiisarnissap anguniarneqarnissaa pingaaruteqartoq Siumut isumaqarpoq. Siunnersuuteqartup sukaterinissamik kissaateqarneranut ajornartorsiutit soppiaat tunuliaqutaanersut itisilerneqassasoq Siumup kissaatigaa. Nakkutilliinerup sukaterneqarnissaa pillugu suleqatigiissitap suliaata Naalakkersuisumit itisilerneqarnissaa Siumup kissaatigaa. Nakkutilliisussaaneq annertusineqassappat pisariaqartitsinermik qulaajaasoqartariaqarneranik Naalakkersuisut

isumaqarnerat aammalu meeqqat inuusuttullu pillugit Inatsisartut peqqussutaannik kiisalu isumaginittogarfup aqunneqarnera aaqqissugaaneralu pillugit Inatsisartut peqqussutaannik pilersaarutaasumik nutarterinissami nakkutilliisussaataanerup ilanngunneqarnissaanik Naalakkersuisut oqarnerat Siumumit innersuussutigineqarput. Tamanna tunngavigalugu siunnersuut ataatsimiititaliamut suliarineqartussanngorlugu ingerlatinneqassasoq Siumut isumaqarpoq.

Demokraatit:

Meeqqat inuusuttullu 1300-t missaat angerlarsimaffiup avataanut inissinneqarsimasut ukioq kingulleq ilisimatitsissutigineqartoq Demokraatit paasissutissiissutigaa. Taakku amerlaqaat meeqqallu inersimasutut inuuneqalernissamut aqqtissiuulluarneqarnissaat inuiaqatigiinnut assorujussuaq pingaaruteqarpoq.

Angerlarsimaffiit namminersortut atorneqarnerisa annertusiartuinnarnerat tunngavigalugu sinaakkutit ersarissisinnearlutillu sukateriffigineqarnissaasa pingaaruteqarneranik Atassutip tunngavilersuutaa Demokraatit isumaqatigaat. Demokraatinit siunnersuut ima paasineqarpoq perorsaanermut tunngasortaa nukittorsarneqassasoq aammalu inuusuttunut angerlarsimaffimmut inissinneqarsimasunut assigiinngitsunut perorsaariaatsip qanoq ittup atorneqarnera pillugu paasissutissiinissamik angerlarsimaffiit ataasiakkaat piunaffigineqartassat. Tamanna nalunaarutikkut ersarissaqqullugu Naalakkersuisut Demokraatinit kaammattorneqarput. Siunnersuut Ilaqutariinnermut Ataatsimiititaliamut suliarineqartussanngorlugu Demokraatinit innersuunneqarpoq.

Atassut:

Misigisaminnik sakkortuunik pissutsinillu allanik inissiinermut tunngaviusunik suliarinnissinnaaqullugit meeqqat inuusuttullu inissinneqartut pitsaanerpaamik atugaqarlutillu toqqissisimanissaat pingaaruteqartoq Atassutip oqaaseqaatimini erseqqissarpaa.

Ulloq unnuarlu angerlarsimaffinnik namminersortunik pilersitsisarneq inatsisitigut sinaakkusiussani ilanngunneqartariaqartoq Atassut isumaqarpoq. Meeqqanik inuusuttunillu ikiorsiisarneq pillugu Inatsisartut peqqussutaannik aammalu isumaginittogarfup aqunneqarnera aaqqissugaaneralu pillugit Inatsisartut peqqussutaannik nutarterinissami pilersaarutaareersumi nakkutilliinermut tunngasut Naalakkersuisunit ilanngunneqalersaarnerat Atassutip maluginiarpaa.

Inatsimmi sunarpiaq sukateriffigineqartussatut kissaatigineqarnerasoq pillugu Siumup apeqqutaanut tunngatillugu Atassutip oqaatigaa angerlarsimaffiit namminersortut sullissinerisa pitsaassusiisalu maleruagassiuunneqarnissaat pingaaruteqartoq. Atassutip isumaa malillugu imaanngilaq tamanna inatsisinik atuuttunik allannguinnikkut pissasoq,

nalunaarummili ilitsersuummilu erseqqissaanissaq pisariaqassaaq, taamaaliornikkut tassunga tunngasoq erseqqissarneqaqqullugu.

Tamanna tunngavigalugu siunnersuut siullermeerneqareeruni Ilaqutariinnermut Ataatsimiititaliamut nalilersugassanngorlugu ingerlateqqinneqartussatut innersuussutigineqarpoq.

Apeqqutit

Ataatsimiititaliap siunnersuummik suliarinninnerani atugassatut apeqqutit arlallit Isumaginninnermut Naalakkersuisunit akissuteqarfigineqarnissaat Ilaqutariinnermut Ataatsimiititaliap qinnutigaa. Ataatsimiititaliap apeqqutaasa taakkunungalugu akissutip assilineri ilanngussat ilanngullugit isumaliutissiisummut matumunnga ilanngussaq 1-tut ilanngunneqarput.

Ataatsimut isigalugu ataatsimiititaliap apeqqutai kommunit kattunnerisa kingorna kommunit meeqqanik nakkutilliinermikk meeqqanut inuusuttunullu ikiorsiisarneq pillugu Inatsisartut peqqussutaanni nr. 1-mi, 15. april 2003-meersumi § 4, imm. 1 naapertorlugu ingerlatsisimanerannut tunngassuteqarput. Meeqqanut inuusuttunullu angerlarsimaffimminni najugaqartunut, meeqqanut inuusuttunullu nammineq isumaqatigiissuteqarnikkut inissinneqarsimasunut aammalu ilaqutariinnut paarsisartunut inissinneqarsimasunut kiisalu meeqqanut inuusuttunullu ulloq unnuarlu angerlarsimaffinnut inissinneqarsimasunut sanilliullugu nakkutilliineq qanoq aaqqissuussaanersoq akissuteqarfigineqassasoq ataatsimiititaliamit kissaatigineqarpoq. Aammattaaq kommunini ornigulluni nakkutilliineq qanoq ingerlanneqartarnersoq, kikkut nakkutilliisussaatitaanersut kiisalu angerlarsimaffiit assigiinngitsut assigiimmik nakkutigineqartussaatitaanersut periutsillu assigiinnersut paasinissaat ataatsimiititaliap kissaatigisimavaa. Tamatuma saniatigut apeqqutigineqarsimavoq nakkutilliisussaatitaaneq pitsaanerulersinneqarpat meeqqat ataasiakkaat peroriartorminni atugaannut pitsanngorsaataassanersoq kiisalu ilanngussaq 2 naapertorlugu Ombudsmandip J. nr. 2008-905-0007-imi oqaaseqaataa eqqarsaatigalugu nakkutilliinerup allanngortinneqarnissaa Naalakkersuisunit isumaliutigineqarsimanersoq. Kiisalu nakkutilliinermut suleqatigiissitap Naalakkersuisoqarfiup nakkutilliinermik suliaqarneranik ingerlaavartumik naliliisarnera qanoq ingerlanersoq akissuteqarfigineqassasoq ataatsimiititaliamit qinnutigineqarpoq.

Ulloq 16. april 2010-mi allagaqarluni Isumaginninnermut Naalakkersuisup ataatsimiititaliap apeqqutai akivai, ataanilu allassimasut akissuteqaatit eqikkagaapput.

Naalakkersuisoqarfiup nammineq suleqatigiissitaa misissuineramik annikinnerusumik suliaqarsimasoq kiisalu isumaginninnermut maleruagassanik kommunit aqutsineranni killiffik pillugu nalunaarusiarsimasoq Isumaginninnermut Naalakkersuisup paasissutissiisutigaa. Nalunaarusiami inerniliunneqarpoq kommunini sulianik piviusumik ingerlatsineq

amerlanertigut pitsaasuusooq. Apeqqutini inatsisitigut tunngavissaqarnermut tunngasuni erserpoq maleruagassanik paasinninnerminni atuinerminnilu kommunit ilaat nalornissuteqartartut.

Isumaginninnermut Naalakkersuisup nangilluni paasissutissiissutigaa meeqqanik inuusuttunillu ikiorsiisarneq pillugu Inatsisartut peqqussutaanni § 4 naapertorlugu kommuni meeqqanik inissinneqarsimasunik eqeersimaartumik akuliunnikkullu nakkutilliissasoq. Iliuusissatut pilersaarutit inatsimmi § 14 aamma 15 naapertorlugu pisussaaffigisat kommunimit suliarineqarnissaat aammalu meeqqamik inissinneqarsimasunik akuttunngitsumik kommunip takuniaallunilu attaveqartuarnissaa pingaaruteqarmat Naalakkersuisup erseqqissaatigaa.

Isumaginninnermut Naalakkersuisup oqaatigaa Naalakkersuisoqarfiup kommuninik misissuisimanera nakkutilliilluni takuniaanerit nutaamik aaqqissuuteqqinneqarnissaannik Naalakkersuisoqarfiup sulineranut ilaatinneqassasoq.

Kommuni meeqqamik nakkutilliisussaatitaavoq, Naalakkersuisoqarfilli inissiiiviusumik nalinginnaasumik nakkutilliisussaatitaalluni. Kommunip nakkutilliisussaatitaanerani apeqqutaanngilaq ulloq unnuarlu angerlarsimaffik sorleq pineqarnersoq.

Inatsit sumiginnaasarnerlu imminnut ataqtigiittut Isumaginninnermut Naalakkersuisup takutissinnaanngilaa, Naalakkersuisorli malillugu meeqqat inuusuttullu pitsaanerpaamik inuuneqarnissaat qulakkeerniarlugu pitsanngorsaatissat allanngortitsinissallu inissaqartinneqartuassapput. Taamaattumillu inatsisinik nutarterineq Naalakkersuisoqarfimmit pilersaarutigineqarpoq. Kommunit angerlarsimaffiutaannik angerlarsimaffinnillu imminnut pigisunik pilersitsinermi ingerlatsinermilu nakkutilliineq periutsillu pillugit ilitersuummik akissutini Isumaginninnermut Naalakkersuisup ilaqartippaa. Iitersuut december 2009-meersuuvoq, taamaattumillu aalajangiiffigisassatut siunnersuutip siullermeerneqarnerani suliarineqarsimanani.

Kommunit nakkutilliisussaatitaanerminnik sumiginnaasimatillugit kommunit akisussaasuusut, Naalakkersuisoqarfilli immikkoortumik nakkutilliisussaatitaanini aqutigalugu suliassanik aalajangersimasunik misissuinissamat pisussaaffeqartoq Isumaginninnermut Naalakkersuisup tikkuarpaa. Taamaalillunilu kommunit ataasiakkaat nassuiaateqarnissaat Naalakkersuisoqarfimmit qinnutigineqarsinnaavoq, taannalu naammaginarinneqanngippat Naalakkersuisoqarfik kommunimut nakkutilliartorsinnaavoq, taamaalillunilu nakkutilliineq pillugu nalunaarusiorluni.

Kommunip iliuseqarnissaanik peqqusinissamat Naalakkersuisoqarfik tunngavissaqanngilaq, kaammattuutaali kommunimit malinneqanngippata Naalakkersuisoqarfik Nakkutilliisoqarfimmut saaffiginnissinnaavoq. Naalakkersuisoqarfiup kaammattuutai

7. november 2010

UKA 2010/52

(UKA 2010/25)

(UKA 2009/62)

kommunit malinneqanngippata Nakkutilliisoqarfik kommuninut arlalinnik
iliuseqarsinnaavoq.

Kiisalu Ombudsmandip oqaaseqaateqarneranut atatillugu akissuteqaat
naammassineqarsimasoq taannalu Ombudsmandimut piaartumik kingornalu Ilaqutariinnermut
Ataatsimiititaliamut nassiunneqassasoq Isumaginninnermut Naalackersuisup erseqqissarpaa.

Ilaqutariinnermut Ataatsimiititaliami naliliineq

Inatsisunik nutarterinermik Naalackersuisoqarfik aallartitsiniartoq aammalu nakkutilliinerup
pitsaanerulersinneqarnissaa anguniarlugu Naalackersuisoqarfiup nakkutilliineranik
ingerlaavartumik naliliisartussamik suleqatigiissitamik pilersitsisoqarsimasoq
Isumaginninnermut Naalackersuisup akissutaa tunngavigalugu Ilaqutariinnermut
Ataatsimiititaliamit ilaatigut inerniliunneqarpoq. Tamatuma saniatigut iliuusissatut
pilersaarutit pillugit maleruagassat kommuninit malinneqarnerat Naalackersuisoqarfimmit
assut isiginiarneqartoq inerniliunneqarsinnaavoq.

Iltersuut nassiunneqartoq ilanngussarlu 1-mut ilanngunneqartoq Ilaqutariinnermut
Ataatsimiititaliap misissorpaa: *Ulloq unnuarlu meeqqanut inuusuttunullu paaqqinnittarfinnik
kommunip pigisaannik imminnullu ingerlattunik pilersitsinermut ingerlatsinermullu ulloq
unnuarlu paaqqinniffiit pillugit immikkoortortap iltersuutaa.*

Iltersuummut atatillugu suliaq ataatsimut isigalugu iluarisimaarneqarmat Ilaqutariinnermut
Ataatsimiititaliamit oqaatigineqassaaq ataatsimiititaliarlu isumaqarpoq iltersuut ersarissaq
aammalu angerlarsimaffinnik kommuninit pigineqartunik imminnullu pigisunik
pilersitsinermi ingerlatsinermilu suut piumasaqaataanerannik ersarissumik nassuiaasoq.

Isumaginninnermut Naalackersuisumut apeqqummut 11-mut tunngatillugu Ilaqutariinnermut
Ataatsimiititaliamit erseqqissarneqassaaq apeqqut Ombudsmandip J. nr. 2008-905-0007
isumaliutissiissummut uunga ilanngussaq 2-tut ilanngunneqartoq pillugu oqaaseqarnera
tunngavigalugu saqqummiunneqarmat.

Naalackersuisut nakkutilliinermik suliassat qulaajarniarlugit inatsisit atuuttut
Ombudsmandip misissorsimavai. Ilaatigut danskit immikkoortumik nakkutilliinerat pillugu
Folкетинip Ombudsmandiata oqaaseqaatai ilanngullugit misissueqqissaareernermigut
Ombudsmandip oqaaseqaatimini ilaatigut inerniliuppaa suliassat sorliit Naalackersuisut
Kalaallit Nunaanni isumaginnittoqarfimmik siulersuineranni nakkutilliinerannilu ilaanerat
erseqqarluttoq.

Nakkutilliinermik suliassaq ingerlatsineq pillugu inatsiseqartitsinermi immikkoortunik
nakkutilliisarneq pillugu malittarisassat nalinginnaasut qanoq paasineqarnissaannik
nassuiaaneq aallaavigalugu nassuiarneqartariaqartoq oqaaseqaatimini Ombudsmandip
nalilerpaa.

Tamatuma peqatigisaanik inatsimmi atuuttumi erseqqarluttut piusut qanoq iliorluni qulaajarneqarsinnaanersut isumaliutigeqqullugu Ombudsmandip Naalackersuisut qinnuigai. Naalackersuisut nalunaarutitik pisortatigoortumik nalunaarsuiinnaratik meeqqanik angerlarsimaffiup avataanut inissiinernik nalunaarutiginninnerit tiguneqartut nakkutilliinermik suliaqarnerminni ilannguttariaqaraat Ombudsmandip ilanngullugu kaammattuutigaa.

Ilaqutariinnermut Ataatsimiititaliaq Isumaginninnermut Naalackersuisumut april 2010-mi apeqquteqarmat Ombudsmandimut akissut suli piareersimanngilaq.

Naalackersuisut nakkutilliinermik oqartussaasutut pisussaaffii pillugit Isumaginninnermut Naalackersuisoqarfiup allakkiaanik 14. juni 2010-meersumik Ilaqutariinnermut Ataatsimiititaliaq ilisimatinneqarpoq, tassani nakkutilliinermik suliassat qanoq annertutiginerannik apeqqut pillugu Ombudsmandip oqallisigisai Naalackersuisoqarfimmit nangingneqarput. Allakkiaq taanna isumaliutissiisummut matumunnga ilanngussaq 3-tut ilanngunneqarpoq.

Issuaanerit matuma kingulianiittut nakkutilliinermi suliassat ersarissarneqarnissaat pillugu Naalackersuisoqarfiup sutigut allannguiniarneranik nassuiaataasut ataatsimiititaliamit immikkut maluginiarneqarput:

”Peqqussummi § 13-ip erseqqissarneqarnissaa pisariaqarmat meeqqanut inuusuttunullu inatsisip nutarterneqarnissaani Naalackersuisoqarfiup aalajangersagaq erseqqissassavaa kiisalu sammisag pillugu Ombudsmandip oqaaseqaatai ilanngullugillu itisilerlugit inatsimmut nassuiaasiortoqassalluni”

”Naalackersuisoqarfiup misissuinerata kingunerisaanik Naalackersuisoqarfiup nakkutilliineranut atorneqartussamik nutaamik ilitsersuusiortoqassaaq aamma kommunini atorneqartussamik ilitsersuusiortoqarluni.”

”Meeqqanut inuusuttunullu inatsisip nutarterneqarnerani nakkutilliinermut aalajangersakkat sukaterneqarnissaat Naalackersuisoqarfimmit eqqarsaatigineqarput, taamaalilluni kommunit akulikinnerusumik nakkutilliisalerlutik tamatumalu pitsaassusaa qaffallugu, tassa meeqqap oqaloqatigineqarnera isiginiarneqalerluni nakkutilliinermilu suleriaasissat allanneqarlutik. Kiisalu inatsisip atorneqarneri Naalackersuisoqarfimmit isigineqarpoq, tassa misissuinerup takutimmagu kommunit ilaasa tunngaveqarnermik apeqqummut tunngatillugu ajornartorsiuteqartartut.”

”.. Naalackersuisoqarfimmit aamma pilersaarutigineqarpoq nakkutilliineq pillugu nalunaarut nutarterneqassasoq tamannalu pillugu ilitsersuusiortoqarluni.”

”Peqatigisaanillu nakkutilliinermi nutaamik aalajangersagaliortoqalerpat.....Danmarkimi naalagaaffiup nakkutilliineranik nutarterinermi Naalackersuisoqarfik isumassiorniarluni.. ”

Siuliani issuaanerit tunngavigalugit inerniliunneqarsinnaavoq ilaatigut kommuninik nakkutilliineq pillugu nutarterinermik Naalackersuisoqarfik maanna ingerlatsisoq.

Naalackersuisup Ilaqutariinnermut Ataatsimiititaliamut akissutaata 2010-mi apriliip qaammataaneersuunera aammalu suliassaqarfimmi arlalinnik iliuuseqarnissaq eqqarsaatigineqartoq Naalackersuisoqarfiup Ombudsmandimut akissummini allakkaa eqqarsaatigigaanni iliuusissatut aallartinneqarsimasut killiffiat siuariartornerallu pillugu nassuiaammik nutartikkamik Isumaginninnermut Naalackersuisup siunnersuutip aappassaaneerneqarnissaanut saqqummiussaqaarnissaa pisariaqartoq Ilaqutariinnermut Ataatsimiititaliaq isumaqarpoq. Tassunga ilanngullugu nutarterinermik sulineri piffissaliussat aammalu nakkutilliinerup qanoq pitsanngorsarneqarsinnaanerani aaqiissuutissanik nassaarniarnermini Naalackersuisoqarfiup suleqatigiissitaliaata killiffia pillugu nassuiaasqaarnissaa ataatsimiititaliamut kissaatigineqarpoq. Tassunga ilanngullugu peqqussummi § 13-imut erseqqissaammik kiisalu inatsimmut nassuiaatinik, pineqartoq pillugu Ombudsmandip oqaaseqaataanik imaqartunik itisiliisunillu qaqugu suliaqartoqalersaarnera ilanngullugu akissuteqarfigineqassasoq kissaatigineqarpoq.

Maleruagassanik paasinninnermini atuinerminnilu kommunit nalornissuteqartartut Naalackersuisoqarfiup nammineq misissuisitsinerani ersepoq. Maleruagassat sorliit kommunit tunngavissiiniarnermini ajornartorsiutigisarneraat itisiliivigineqassasoq ataatsimiititaliamut kissaatigineqarpoq.

Aamma suliassat suliarineqartarnerat pillugu inatsimmi aammalu pisortat ingerlatsinerat pillugu paasitinneqarsinnaatitaaneq pillugu inatsimmi suliameq peqataasinnaannigineq, peqataasup isumaanik tusarniaaneq, suliassamut tunngasumik ilisimasaqarsinnaatitaanermut tamanullu saqqummiussisnaanermut il.il. tunngasumik maleruagassanut angerlarsimaffiit namminersortunit pigineqartut qanoq annertutigisumik ilaatinneqarnersut akissuteqarfigineqassasoq ataatsimiititaliamut kissaatigineqarpoq.

J.nr. 2008-905-0007-mi Ombudsmandip oqaaseqaataanut Ilaqutariinnermut Pisortaqaarfiup (maanna Isumaginninnermut Naalackersuisoqarfiusup) Ombudsmandimut akissutaani 16. marts 2007-meersumi qupperneq 8-mi allassimavoq *”Nakkutilliartornermi suliat misissorneqartut tunngavigalugit pisortaqaarfik isumaqarpoq inissinernut suliani iliuusissatut pilerssaarutininik kommunit sapinngisartik malillugu suliaqartartut. Taamaattorli suliassaqarpallaarneq pissutigalugu inatsisitigut piumasaqaatit tamatigut kommunit malissinnaaneq ajorpaat. Taamaalilluni ilaatigooriarluni piffissaq eqqorlugu iliuusissatut*

pilersaarutinin suliaqartoqarneq ajorpoq imaluunniit iliuusissatut pilersaarusiortoqartarani.”

Iliuusissatut pilersaarutinin inatsisitigut pisussaaffigisanik suliaqarnissaq kommunit annertuumik ajornartorsiutigisaraat Ilaqutariinnermut Ataatsimiititaliamut arlaleriaqaluni ilisimatitsissutigineqartarpoq. Tassunga atatillugu iliuusissatut pilersaarutinin inatsisitigut pisussaaffigisanik kommunit suliaqanngitsut, taamaalillutillu inatsimmi piunasaqaatinik malinninngitsut Isumaginninnermut Naalakkersuisoqarfimmit paasineqaraangat iliuutsit qanoq ittut aallartinneqartarnersut pillugit Isumaginninnermut Naalakkersuisumit immikkut nassuiaatigineqassasoq Ilaqutariinnermut Ataatsimiititaliamit kissaatigineqarpoq.

Ulloq unnuarlu angerlarsimaffiit ataasiakkaat perorsaaniikkut nakkutilliartorfigineqarnerisa amerlinissaannut 1,2 mio. kr.-inik immikkoortitsinissaq 2011-mi aningaasanut inatsisissatut siunnersuummi Naalakkersuisut siunnersuutigigaat iluarisimaaramiuk Ilaqutariinnermut Ataatsimiititaliap oqaatigissavaa.

1,2 mio. kr.-it atorpeqartussatut eqqarsaatigineqartut pillugit Isumaginninnermut Naalakersuisumik erseqqinnerusumik Ilaqutariinnermut Ataatsimiititaliaq allakkatigut tusarniaavoq. Naalakkersuisup nassuiaataa Ilaqutariinnermut Ataatsimiititaliap naammagisimaarpaa, meeqqanut inuusuttunullu ulloq unnuarlu angerlarsimaffiit aammalu annertuumik innarluutilinnut ulloq unnuarlu angerlarsimaffiit kiisalu kommunit namminersortullu ulloq unnuarlu angerlarsimaffiutaat nakkutilliinerit amerlingaatsiarneqarnissaat pilersaarutaasoq Ilaqutariinnermut ataatsimiititaliap maluginiarjaa. Nakkutilliinerit ingerlanneqarnissaannut inunnik marlunnik suliaticigut naleqquttunik pisinnaasallit Naalakkersuisoqarfup atorfinitsissamaarjaa. Aningaasarsiat saniaticigut angalanernut unnuinernullu aningaasartuutitut annertuunut 1,2 mio. kr.t atorpeqassapput.

1,2 mio. kr.-it atorpeqarnissaannut tunngatillugu atornissaannut eqqarsaatit pillugit Isumaginninnermut Naalakkersuisup nassuiaataa Ilaqutariinnermut Ataatsimiititaliap tusaatissatut tiguaa.

Meeqqat pillugit paasisimasalittut qitiusumik ataatsimiititaliami sulineq pillugu Ilaqutariinnermut Ataatsimiititaliamit maluginiarneqarpoq maleruagassat atuuttut Isumaginninnermut Naalakkersuisumit ersarittutut isigineqartut. Taama oqarneq Ilaqutariinnermut Ataatsimiititaliamit tusaatissatut tiguneqarpoq ilassutigalugulu oqaatigissallugu meeqqat pillugit paasisimasalittut qitiusumik ataatsimiititaliaq inunnut ataasiakkaanut tunngasunik suliaqartarmat, tamannalu ataatsimiititaliami sulinerup aalajangersimasup ersarissarneqarnissaa ajornakusoortikkaa. Meeqqalli pillugit paasisimasalittut qitiusumik ataatsimiititaliap sulineranut atasumik aningaasartuutit Naalakkersuisunit akilerneqartussapput, taamaattumillu meeqqat pillugit paasisimasalittut qitiusumik ataatsimiititaliamut tunngatillugu suliassami kisitsisit aningaasanut inatsisissani

ersarissisinnegarnissaat Ilaqutariinnermut Ataatsimiititaliap Naalakkersuisunut qinnutigissavaa, taamaalilluni ataatsimiititaliap taassuma sulinera siunissami ersarissunngortinneqarsinnaaqullugu.

Nakkutilliiartornernit nalunaarusiat, kommuninut nakkutilliiartornernut atatillugu Naalakkersuisunit suliarineqartut assilinerinik Ilaqutariinnermut Ataatsimiititaliap siunissami nassinneqartalissasoq ataatsimiititaliap Naalakkersuisunut qinnutigaa.

Ataatsimut isigalugu Ilaqutariinnermut Ataatsimiititaliap isumaqarpoq iliuitsit arlallit ilorraap tungaanut saatitsisut aallartinneqarnerannut siunnersuut una peqataaqataasoq.

Ulloq unnuarlu angerlarsimaffinni pissutsit eqqumaffigineqarnissaannik pisariaqartitsineq

Ulloq unnuarlu angerlarsimaffinni nakkutilliineq pillugu iliuusissat aallartinneqareeraluartut ulloq unnuarlu angerlarsimaffinni pissutsit Ilaqutariinnermut Ataatsimiititaliamit assut eqqumaffigineqarput. Tamatumani eqqarsaatigineqarput ulloq unnuarlu angerlarsimaffinni najugaqartut sulisullu kiisalu taakku ingerlanneqarnerat minnerunngitsumillu taakkunani perorsaanikkut suliat.

Ulloq unnuarlu angerlarsimaffiit pillugit ukiumoortumik nalunaarusianik Ilaqutariinnermut Ataatsimiititaliap misissuinermini aammalu ulloq unnuarlu angerlarsimaffinnut paasisassarsiorluni takuniaanerpassuarmini paasivaa ulloq unnuarlu angerlarsimaffinni pissutsit arlallit ajornartorsiuteqarfiusut. Ulloq unnuarlu angerlarsimaffiit Isumaginninnermut Naalakkersuisumit ukiuni aggersuni aamma eqqumaffigineqarnissaat pisariaqartutut Ilaqutariinnermut Ataatsimiititaliamit piumasarineqarpoq, taamaalilluni ulloq unnuarlu angerlarsimaffinni najugaqartut atuisullu perorsaanikkut suliniuteqarfigineqarnerisa ersarissarneqarnissaat nukittorsarneqarnissaallu taakkulu ataatsimut isigalugit tunngavissisinnaaqqullugit, tamatumalu sania-tigut sulisut tigungmiinnarnissaat eqqarsaatigalugu suliatigut ineriartortitsinissamut pisariaqartitanullu naleqqussarnissamut pitsaasumik avatangiiseqarlutik ulloq unnuarlu angerlarsimaffiit suliffeqarfittut orniginarnerulersinnaaqqullugit.

Naak suliniutit aallartinneqareeraluartut meeqqat inuusuttullu angerlarsimaffiup avataanut inissinneqarsimasunut atatillugu perorsariaatsit pitsaassusaasa annertunerusumik Naalakkersusut qulakkeerinninnissamik suliaqarnissaat pisariaqartoq Ilaqutariinnermut Ataatsimiititaliap isumaqarpoq. Taamaattumik ulloq unnuarlu angerlarsimaffinni nutaani pioreersunilu perorsariaatsini atorneqartuni nukittorsaanerup ingerlanneqarnissaa pingaaruteqartoq ataatsimiititaliap isumaqarpoq.

Ataatsimiititaliap inassuteqaatai

7. november 2010

UKA 2010/52

(UKA 2010/25)

(UKA 2009/62)

Taama oqaaseqarluni aammalu suliat kiisalu suliassa qarfiup suli eqqumaffigineqarnissaa innersuussutigalugit aalajangiiffigisassatut siunnersuut taama iluseqartoq Inatsisartunit aappassaaneerlugu inaarutaasumik sularineqarnermini akuersissutigineqassasoq Ilaqutariinnermut Ataatsimiititaliap inassutigaa.

Debora Kleist

Siulittaasoq

Jane Petersen

Astrid Fleischer Rex

Ruth Heilmann

Knud Kristiansen